

**IZESU' EVENELE ZUHO
KOLOSA NUMUNO EBEKU'
MULISE MILAA' AVETI
LUHUVO NITE' PAULO'
GIZE-NGIDINE'**

**Izesu' Evenele Kolosa Ebeku'
Minani' Neti Luhuvo Nite'
Paulo' Gize-ngidingumu'
Gomu' Gataa' Gamazi**

Mene luhuvo nite' nene aposolo' Paulo' gizine' ve. A'mine Paulo' monovo'vemu' nene Aposolo' bukUU' nene gatelesane. Ido' Izesu' Kilisito' evenele zuho Loma ebeku' minani' neti luhuvo nite' Paulo' gize-ngidingumu' gomU' gataa' gamazi gizuningukisi nene ei' Paulo' monovo'vemu' nene ma gatelesane. Ido' Paulo' luhuvo nite' mene gizine' nene Izesu' evenele zuho ebe' ma Kolosa ve langu' minani' nene gize-ngidine' ve. Ido' a'mine luhuvo nite' nogizo Timoteo' nesi nohulo-lingidusive lo gizine' ve.

A'mine ebe' Kolosa nene Loma vete gizebo ani' polovinisi Asia ve langu' misubo ma Hiligia ve langu' minine'. A'mine tauni nene mo gozopo' tauni gehepeve mino gomU' gamenela tauni naba minine' ne'mino minamo mo ngomo ogo minine'. A'mida minave linge muki' nene Hiligia ve minani'za nGiliki aleve muki' nesi minani' ve. Ido' gozopo' aka'mila nGiliki ve naba mali'mo a'mida minani' kanitili muki' ngivile' ogo gizebo ve'ine naba lolo' ine' ne'mo

Zuda aleve muki' Babelonia misubouko minadati' nene ngele'mizo ogo a'mine Hiligia misubou' minilizave lo hulo-ngidine' nenako nemu' nene Zuda ve mukikisi Kolosa ebeku' minani'. Ido' a'mine aleve mukikuti' Zuda ve minamave ingine soza o'mosovo' nge'metaa' ani' ve.

Ei' Paulo' nene Kolosa ebeku' vamine'za ei' hize ele' i-daa' aveuti' Kolosa ve ma minine' gulive Epahala' ne'mo Izesu' gamazi've lamine' nene Kolosa aleve lo-ngimine'. Mene luhuvo nite' gazine' gamenela nene Paulo' aza Loma ebeku' nala' numungu' minine'. Nala' numungu' mino Izesu' evenele Kolosa ebeku' minani' nene evene' malite soza mono' apizi ningimave lani' nene gelo a'mine soza mono' li minani' nene do lisihe' o-ngedelesamu' luhuvo nite' mene gize-ngidine'. A'mine luhuvo nite' gazine' gamenelokovo' nene Izesu' evenele zuho Eheso ebeku' minavesi luhuvo nite' gize-ngedo ido' Hilemoni'nisi luhuvo nite' ma gize-dine'. Izesu' evenele zuho Kolosa ebeku' minave gize-ngidine' luhuvo niteku' minine' gamazi linge muki' nene Eheso aleveliti luhuvo nite' gize-ngidingu' nesi minine' ve. A'mine luhuvo nite' setohamo nene Paulo'ni hize ele' o-daa' ive ma gulive Tikiko' ne'mo do vo gize-ngidive nene ngimine'. Onesimo' nene Tikikokisi maka' vasine'. Onesimo' nene Hilemoni' gelekele' ve've mino hulo-do golise vive minine'. Aza golise vo Loma ebeta vo Paulo'ni ningo lulo do velepe' izo Izesu' evenele lolo' ogavo Paulo' aza Hilemoni'nida tine' molo vilive lo imiseline' ve.

Soza mono' apizi ngimaa' ave ingine nani'mine mono' li-ngimaa' ahe nemu' ma gelo osu'

lamune'za Kolosa aleve nene ne'mine gamazi li-ngimi nilisave lo gele none: Misubo mesi a'mingu' nizani' inite' nesi ado' laza ningo do gelaa' nounge' inite' muki' nesi nene inite' golosovo' nizave li li-ngimaa' ani' noloseive. Ido' O'moso aza evene' lamine' gehepeve neine' nenako ngelo ne'mine inite' goloso lolo' amoloseive. Gana' api' ogo nene eikuti' evene' nehe angelo' nehe ei' gele vine' ma do soto' molani'za aza evene' lamine' gehepeve neine' ne'minosa minamine' ve. Neloti' nene a'mine angelo' ne'mo eikuti' angelo' gohi ma do soto' molani'za ei' lamine' minine' ne'mine nomive. Ne'mine ogo do soto' molavo a'mine angelo' ne'mosi eikuti' angelo' gohi ma do soto' molani'za azasi do soto' o-dine' angelo' lamine' minine' ne'mino minamine'. Ne'mine igi angelolite gidika' gidika' i'mi vani' nene gamene vai' ogavo neloti' alinge' gehepeve angelo' ma soto' ine' nene goloso gidini soto' ogo inite' muki' do soto' molani'. Ne'mine li Kilisito' nene O'moso gihile minamo ha a'mine soto' i'mi vani' angelokuti' minine' ve lani'. Ido' a'mine angelokumu' nene amuzo'inesi mini initeto' nesi gizebo iga' ani' sikalahu' ve li laa' ani'. Evene' ingine O'moso ningo gelo lukuvo nalone li ma ingine a'mine guve'inesi sikalahu' nene mono' li-ngimilizave lani'. Ido' a'mine O'moso ningo gelaa' monovo nene suno' inite' neine' nenako evene' lingelitevo' ningi gililizado' o neive lani'. Ido' ne'mine igi lukuvo nalone li gilave ingine oko'ine lolovo huki ido' gamene naba ve li gamene ma di

kegesi a'mine gameneu' holise' mini ido' noso' nite' linge ma malise igi mini ido' inite' linge malo' di gilami minilizado' o neive lani'. Evene' malite gotine izikevo angelo' mono' li-ngimi ido' gamene linge mamu' gamene naba ve li holise' minilo ido' ne'mine noso' nite' malise ilo ido' ne'mine initeto' di gilamilo li-lingidilizado' gili dikelizaze. Kilisito'ni di gili' li di minilo lo lo-ngimine'. Ne'mine lou' gamazilo' gele daa' ne'mo oko'ine'mi emeni dameni goloso di'mi limilizangumu' nene hize ele' o-ngedamoloseive line'. Lu'ine ga'ine nene Kilisitodokisi ido' Okulumokuko nizani' initetokisi mili gili' li mini monovo goloso ato' ato' daa' nani' muki' nene huli osu' lilizado' o neive. Asi monovo laminetokovo' e'metilizave. Ado' ge luka neme ne lu'ne geme laa' ido' Kilisito' aza engi' lihime'ine hulo-ngidine' ne'mini inginesi ge lihime'ne hulo-nede ne lihimeka hulo-gede lilizave. Nevo'mine monovolo' e'metilizave lo line'. Ne'mine lo ele'ninge va'ninge izipaha'inesi ize'ninge me'ningesi ido' gonou' vesi gizebo ve'ine netesi ingine minilizangu' nene nani'mine monovo i-ngimi minilizahe ne'mi monovo lo ngolo' lo lo-ngimine'. Ido' O'mosola livo' minilizangumu' gohi lo ga'ine ogo a'mine O'mosola lilizangu' eikumukisi lilizangumu' lo-ngimine'. Izesu' evenele minamave monovo i-ngimilizangu' nene monovo golososi o-ngedalone li ehe' igi minilizangumu' lo-ngimine'. Ne'mine lo ti' lo lo-ngimine': Tikikoki Onesimoki ingine lengi' nizadaa vilisa nasine' nenako a'mine vilisingu' nene mela soto' ine' inite' mukikumu'

nene li-lingimilisasive lo lo-ngimine'. Neloti' nene luhuvo nite've gize osu' lolosa eikisi maka' nizavelite mese' aseka gamazi li engikisi minave linge mamu' hulani' nene lo-ngemo no'noho' gamazidunu' luhuvo nite've nene gize osu' line' ve.

Paulo' Gamazi Api' Olosa Izesu' Evenele Kolosa Ebeku' Minave Nene No'noho' Gamazi Lo-ngidine' Gamazi

¹ Izesu' Kilisito' aposolo mineline lo O'moso'mo ei' lulolo' nele'mize molave Paulo' naza leze zuho Timoteokisi maka' mino ² leze zuho O'moso'mi evenele Kolosa ebeku' mini Kilisito'nimu' gili ele'vole' igi e'mete lamine' igi minave lengi' nene luhuvo nite' mene nogize-lengedo ti' lo noluve: Meteho O'moso eitati' nasahili' ido' hongu lo lamino minaa' monovo nene lengikisi miniliho lo noluve.

Paulo' Aza Kolosa Aleve Nene Mono' nGemeni Dameni Laminekisi Minilizave Lo O'mosola Laa' Ingumu' Lo-ngimine' Gamazi

³ Laza lengikumu' Guvetesi ve Izesu' Kilisito' meleho O'mosola laa' uningu' nene gamene gamene lengikumu' nene O'moso isaa' neve lo-daa' nounge. ⁴ Lengikumu' O'mosola laa' nounge' nene lingine Izesu' Kilisito'nimu' gili ele'vole' angumukisi ido' O'moso'mi evenele zuho muki' lutine ngimaa' naani' mamukisi nene geloosa O'moso isaa' neve lo-daa' nounge. ⁵ Lingine ne'mine igi Izesu' Kilisito'nimu' gili ele'vole' igi O'moso'mi evenele lutine ngimaa' naani' nene gomuta lingine gamazi gihile Kilisito'

gamazi lamine' li-lingimangu' nene O'moso'mo Okulumokuko salani molo-lingidine' initekumu' nene giliisa a'minemu' gili medeli minani' ne'mo nene ne'mine ani' ve. ⁶ A'mine lengita ani' gamazi lamine' ne'mo nene lingine gana' api' igi giliisa O'moso'mi nasahili've'mi monovo gihilemu' ningi vevesani' gameneloti' lengita idi'mine ogo a'mine gamazi lamine' nene gihile noizo misubou' misubou' hutile' ogo naba o'mo novive. ⁷ Ido' a'mine O'moso'mi nasahili've'mi monovo gihilemu' nene leli' gidini ve Kilisito' gelekele' ve've lute eme nonive Epahala' ne'mo apize lengemavoo gili nizani' ma neive. Ei' neve nene lelito' medelo Kilisito' gonolo' nene pele-seve' ngomosi ma izamo daa' ive ne neive. ⁸ Ido' ei' neve nene lingine O'moso'mi Sikalahuli'mo do ote-lengedavoo lutine ngimaa' monovotine lengita minine' nemu' lo-limive ne neive.

⁹ Ido' lingine ne'mine igi minani' nemu' gilune' gameneloti' lengikumu' nene gamene gamene O'mosola laa' nouningu' nene O'moso'mo monoku' otohato ve gehepeve lolo' o-lengedavo lingine ei' Sikalahutati' gele vevesaa' monovo di nizavo ne'mo nene ei' O'moso'mi lulolo' minine' monovomu' nene gili osu' li minilizave losa laa' noune. ¹⁰ Guvelesi ve'mi evenele minilizani' votigilelo' mini mili mini Guvelesi ve'mo ninge lamine' daline' monovolokovo' nene e'meti minilizave. Ne'mine ikevo ne'mi gihile nene gono lamine' ato ato' muki' di nizavo O'mosomu' gili vevesaa' ani' monovotine nene naba o'mo vo minelive. ¹¹ Ido' O'mosolati' atoli'mine ogo minine' amuzo've nene lengemavoo ne'mo

ele'vole' gehepeve igi mini lengita geni ato ato' muki' soto' o-lengedelingu' nene hongu li mini ha gihi di dizivo' minilizado' lisihe' i mini longolize izi ¹² metehida nene isaa' neve li tangezo' ve li-dilizave losa nene O'mosola laa' nounge. Aza nene labana'vesi minine' ebe'veu' eze evenele salani molo-lidine' inite' linge nene dalizado' do lisihe' o-lengede neive. ¹³ Ee, liti'muso melehi amuzolo' mino gelekele' o-do minuninguti' nene do lu' izo hulo lulo eme neine' gipele'mi gizebou' o-lede neive. ¹⁴ A'mine gipele ne'mo nene meni hizo do kuluhize-lidine' nene ado' lihime apase-lidine' neve ne neive.

Kilisito' Emeni Damenimukisi Gono Daa' Neingumukisi Paulo' Lo-ngimine' Gamazi

¹⁵ Ido' a'mine O'moso'mi gipele nene ning-amoso' o minine' O'moso ne'mi avazaha ne'mine mino O'moso'mo inite' do soto' molani' muki' neti naba'ine ne neive. ¹⁶ Ido' inite' mukil-iti naba'ine neive noluvoni' nene inite' Oku-lumoku' minani' initekisi misubou' initekisi muki' nene eitatikovo' soto' ani' nenako nemu' nene naba'ine ve noluvoni' nene ado' ningaa' nounge' initekisi ido' ma ningamaa' nounge' initekisi ato ato' initeti' gizebo igi minaa' ave dizi minani' limi minani' guve'inesi ve mukikisi nene eikumukovo' asi've do soto' o-ngidine' ve. ¹⁷ Ido' ei' neve nene inite' mukikisi olihe soto' amavosa ha mino inite' muki' hize ele' o-ngedo neivosa ei' amuzolo' nene nizave. ¹⁸ Aza nene eze evenele mulise ei' oko'no ne'mino minuniveti godotelo' minive ne neive. Aza nene leli' minevo' alevote'mi izeleho mino ei' nene inite' muki' ngivile' ogo dizo minelove losa gomu' molo

lemo hilinguti' otine' ve. ¹⁹ Ido' O'moso'mo ei' gipele ezelo' lisihetokovo' minelive lo gala gilido' do molo laavo a'mine gipelela nene ei' O'moso'mi emeni dameni've gehepeve mudise mine molo minine' nenako nemu' nene naza ezemu' inite' muki' ngivile' ogo neive noluvoni' nene mo laminetokovo' noluve. ²⁰ O'moso'mo gala gelo laavo a'mine gipele nene lohoto' zalo' helo vanise've lepine' ne'mo nene O'mososi biluva' ogo minuninguti' nene kuku holo-ledo ei' O'mososi inite' mukikisi misubou' inite' nilizahe Okulumoku' inite' nilizahe nesi nene do hamo' o-ledavo uva lo do bizo none.

²¹ Ee, lingine gomu' O'moso huli hoto' i-di mini monovo goloso igi minadi'mo nene lutine gatingu' O'moso biluva' i-di minani'za ²² idise nene Kilisito' aza evene' oko'no've hulo labuluvo ogo hiline' ne'mo nene O'mososi do hamo' o-lingidine' ve. Ido' ne'mine ine' nene lingine golosouti' mine abaza' igi mini lihime okodida dizamivo gamazitine nomivo minikevo O'moso'mi velelo' nene lengele'mize molalove losa nene ne'mine ine' ve. ²³ Ido' ne'mine o-lengedeline' nene lingine mono' gamazi lamine' gilani' gili mu'musi' ani' nene huli vamii gili ele'vole' i mini monoku' nene ele'vole' igi mini mine gili' li minilizanikovo' nene ne'mine o-lengedeleseive. A'mine mono' gamazi lamine' nene li soto' igi misubou' misubou' numudo' namado' ve nene li-ngimikeve. Ido' neni' Paulo' nene a'mine mono' gamazi'mi gonolo' ve lolo' ogo nouve.

Paulo' Izesu' Evenele Zuho Mulisemu' Gono Daa' Ine' Monovo Lo-ngimine' Gamazi

24 Ido' naza lengikumu' ve lo mulumo alumo geni nogihuvoni' nemu' nene idise naza nolize noizuve. Ne'mine nouvoni' nene Kilisito' aza mulumo geni geheline' nene ma ha neivosa naza nene ezelo' medelo ei' oko'no ne'mine lili' igi minave eze evenele zuho mulisemu' nene a'mine ha minine' geni nene do pelelesa neni' oko'nela nene ma nogeho hize ele' noo-lingiduve. 25 Ee, O'moso'mo neni' nene lengikumu' gono doo a'mine gonolo' gizebo ve mineline lo gono nimido' do molosa a'mine Kilisito' evenele zuho mulise'mi gonolo' ve nene lolo' ogo nouve. Ido' ne'mi gonolo' ve lolo' ogo nouvoni' nene O'moso'mo ei' gamazi've nene longemo osu' gehepeve liline losa lo-nedavo nemu' nene gonolo' ve lolo' o nouve. 26 Ido' a'mine gamazi've nene gozopo' aka'mila soto' ika' ika' i'mi ave nene gilamavo suno' gamazi ne'mine minine'za idise nene eze evenele zuho ningi gililizave lo do soto' o-ngede neive. 27 Ee, a'mine suno' gamazi nene ede vine' inite' gehepeve mino Zuda ve minamave heta ato' ve engikisi do oluso' o-ngedelingumu' nene O'moso'mo eze evenele gililizave lo gelo lo-ngemelesa gele minine' ve. A'mine gamazi nene ne'mino neive: Kilisito' neve nene lengiku' neivosa ne'mo nene lingine O'mosolati' inite' atoli'mine ogo minine' nene vi di ti' ilisaaze. Nemu' nene a'minemu' ha gili mu'musi' i minilizado' o neive. 28 Evene' hamo hamo' muki' nene Kilisitoda gi'mizi minisa monoku' lodive ikeni' nizavosavo' O'moso'mi velelo' nene ngele'mize molalane losa nene a'mine Kilisito'nimu' lo soto' ogo evene'

hamo hamo' muki' nene hungo' ngemo otohato monovolo' gehepeve e'meto ei' Kilisito'nimu' nene evene' hamo hamo' muki' apize ngemaa' noune. ²⁹ Ido' ne'mine olongumu' nene Kilisito' atoli'mine ogo do amuzo molo-nedaa' neine' votigilelo' gehepeve do molosa a'mine amuzo-dunu' nene zege' zege' ogoosa ele'vole' ogo gono daa' nouve.

2

¹ Ido' ne'mine noluvoni' nene naza lengiku-mukisi ido' Laodikia ebeku' minavemukisi ido' neni' go'ne ve'ne gehepevelo' ningamave linge mukikumukisi nene mono' gono zege' zege' ogo daa' nouvongumu' nene gililizave losa noluve. ² Ido' ne'mine nouvoni' nene ingine lu'ine amuzo molavo lu'ine ne geme ge neme li di hamo' igi bizi minilizangumu' ve losa ne'mine nouve. Ne'mine igi mono' nene mo gili vevesilizadi'mo nene gili ele'vole' gehepeve igi O'moso'mo suno' molani' inite' Kilisito'nimu' nene gili ngolo' li minilizave losa gele noosa noluve. ³ Ido' mono' gele osu' lo otohato ogo minaa' monovo muki' nene heneni lamine' di haleki mila' naani' ne'mine mino a'mine nene ei' Kilisitoda mine osu' lo neive. ⁴ Ne'mine noluvoni' nene evene' hamolitesi gamazi noso'vesi li-lingimii gotine izi lengele'mize gopo ikelizave losa noluve. ⁵ Ee, naza nene hota goloso nouha lu'ne ga'ne've nene mo lengikisi gehepeve neivo lingine Kilisito'nimu' gili ele'vole' anitine nene ma hulami di gili' li mini di hamo' igi mine lamine' igi nizani' nene ningo gelo nolize izo nouve.

Kilisitoda Gi'mizi Gelekele' I-dani' Ne'mo O'mosolati' Lengemeni Dameni Nene Mo Dikeni' Nenaze. Evenelite Di Soto' Ani' Gamazilo' Nene Gelekele' Igi Minamilo Lo Paulo' Lo-ngimine' Gamazi

⁶ Lingine Guvetesi ve minelive li Izesu' Kilisito'ni nene di ti' ani' nenaze. Nemu' lingine nene ezela e'meti igi milisa minilo. ⁷ Luhisetine nene Izesu' Kilisitodo' do neivosa minevo' alevotine nene eita di lehete igi li-lingimani' gamazilo' nene e'metisa ezemu' gili ele'vole' naani' nene di amuzo mili'mi vi mini a'minemu' O'mosola nene isaa' neve li opo'ni vauve ili li minilo. ⁸ Evene' hamolitesi gotine izi gihile've nomine' gamazimu' nene otohato gamazi lamine' ve li lengele'mize gopo igi a'mido' di gelekele' i-lingidikelizaze. Ehe' igi ningisa minilo. A'ne'mine gamazi li-lingimilizani' nene Kilisito' gamazilo' vo daline' gamazi li-lingimilizavoba asi haza evenelite ne'mine mana'mine initeliti monovomu' nene avotemotidati' li di dizani' gamazivo' nene li-lingimilisave. ⁹ Ido' ne'mine noluvoni' nene ei' Kilisitoda ei' oko'nola gehepeve nene O'moso'mi emeni dameni vai' nene mo mine molo osu' lo neine' nenako nemu' nene noluve. ¹⁰ Ido' O'moso'mi emeni dameni vai' Kilisitoda neine' ne'mo nene lingine ezelo' gi'mizi nizani' nenako eitati' neve nene lutine'mo minevo' alevo' iline' inite' vai' nene lingine di osu' li nizanako nemu' nene ngomosi ma vise' amilisave. A'mine Kilisito' nene guve'inesi ve gizebo iga' amuzo di nizave mukiliti godonido' minive ne neive. ¹¹ Ezelo' vi gi'mizikevosa O'moso'mi noso neve nene mo lengita molo-

lengede neive. A'mine O'moso'mi noso nene evenelite Zuda veti monovolo' e'meti okodine lolovo huki huli-lingidiisa milani' nevoba asi lengemeni dameni litehe nene di hulikevo Kilisito' asi've nene a'mine O'moso'mi noso nene molo-lingidine' ve. ¹² Ee, lingine noso hilangu' nene Kilisito' galeseu' limingu' nene linginesi maka' ezesi limani' gele neive. Ido' ezelo' gi'mizi mini eze galeseuti' do ote-dive O'moso'mi amuzo ne'mo lelikisi do ote-ledelido' lisihe' o neive li gili ele'vole' ani' ne'mo nene ezesi galeseuti' do ote-dingu' nene lengikisi makato' do ote-lingidine' gele neive. ¹³ Ee, lingine O'moso'mi noso lengita nomine' mini lengemeni dameni litehe nene hulamii goloso nite' di minadi'mo lutine hele vine' minanguti' nene Kilisito'nisi maka' lengi' lutinesi nene O'moso'mo do vele gizine' ve. Ne'mino Kilisito'nisi makato' do ote-lidine' giline' nene aza goloso nitete muki' do hulo-ledosa nene ne'mine ine' ve. ¹⁴ Leli' lihimetemu' lo soto' ogo goni' o-ledelesa minine' luhuvo nite' Mose' gizine' lou' gamazi nene lohoto' zalo' belo bado a'mine gamazi ne'mo leli' goni' o-ledeline' amuzo've nene do hulavo osu' gehepeve line' ve. ¹⁵ Ne'mino Kilisito' lohoto' zalo' hilidi'mo nene aza guve'inesi sikalahu' goloso gizebo iga' amuzo'inesi minave nene ngivile' ogosa amuzo'ine nene do hulo-ngedosa a'mine lohoto' zadunu' ngivile' ogosa neine' monovo nene evene' mukiliti ve'nido' do soto' ogo osu' laave.

¹⁶ Ne'mine ine' nenako nemu' nene lingine noso' nite' ma naakumu' nehe malise ogakumu'

nehe evene' malite ne'mine ne'mine ilizave
 lii monovotinemu' ize' mili lii lengemenga
 lilizani' nene gili ngimamilo. Ido' a'mine'mine
 igi evenelite holise' minaa' ani' gamene ado'
 kilisimasilo' kilisimasilo' noso' nite' naba naa'
 ani' gamenelokisi ike'ni gosoho' soto' ine'
 gamenelo' gamenelokisi ido' saleleu' saleleukisi
 nene lingine holise' minaa' naahe minamaa'
 naahe ne'mine naavo evene' malite a'mine
 monovotinemu' ize' mili lii lengemenga nilavo
 ma nene gili ngimamilo. ¹⁷ A'mine noso'
 nite' nehe holise' gamene nehe ne'mine inite'
 nene alinge' soto' ilizani' initeliti avazaha'ine
 mumuno'ine ne'mine minani'za a'mine initeliti
 inite' gihile'ine nene Kilisito' ne neive. ¹⁸ Evene'
 malite ha me misubou' alevete ga'ine gilaa'
 adi'mine igi gilii ingine laza vetelo' inite' o
 molavo ninguune' nenako nemu' nene laza
 mono' monovo gehepeve gele none liisa engi'
 oko'ine nene hazamu' di dizi minii lengikumumu'
 nene lingine amuzo mili okodine di limisa
 angelo' gubi' izi ngimaa' amilizani' nene lukuvo
 nalizado' lisihe' igi minamilisave lii lutingu'
 hizilizani' nene gili ngimamilo. ¹⁹ A'mine
 ne'mine aleve nene leli' godote ne'mino neive
 Kilisitodo' nene eze aleve mukito' gi'mizo none'
 ne'mine igi ingine nene gi'mizamave. Ido' laza
 eito' gi'mizo none' nene ezelati' gu'nuhuvolo
 ne'mo eze oko'no linge ato ato' ne'mine nonive
 muki' nene do gili' lo-lidivo mino O'moso'mo
 hize ele' o-lede neivo ne'mo nene naba o'mo vo
 minaa' noune.

²⁰⁻²¹ Lingine nene Kilisitolesi maka' hiliisa
 me misubou' alevete ne'mine mana'mine

initekumu' gili laa' ani' gamazilo' gelekele' igi minanguti' nene kuluhizisa nizani' nenako nemu' nene lingine a'mine Kilisito'nimu' gilamave me misubou' aleveti muliseuti' ha nizani' gilivo evenelite ne'mine mana'mine initekumu' nene di gilamilo ido' ni gilamilo ido' diisa igi mili amilo li li-lingidaa' ani' gamazilo' gelekele' igivo' minaa' naani' nene nanimu' naave. ²² Inginge ne'mine li-lingidaa' ani' inite' nene ha igi mili naavo osu' loosa vo haza oga' neine' initekumukovo' nene li-lingidaa' ani' ve. Ido' ingine ne'mine iga' ani' nene haza evenelitevo' apizi ngimi li huki li-ngidaa' ani' gamazilo' e'metiisa iga' ani' ve. ²³ A'mine laa' ani' gamazi ne'mo nene okodeloti' monokumu' lanite' gelo amuzo molo e'metaakumukisi ido' leli' okode nene lanite' gelamiline' inite' o-do do limune' gelo minaakumukisi nene laa' neine' nenako a'mine neve nene otohato gamazi gele neine'za a'mine lemeni dameni litehe ne'mo lanite' giline' monovo nene do lemedoo e'metamo mineloningumu' nene mo keke' hize ele' o-ledesa'mive.

3

Lingine Nene Kilisitolesi Hiliisa Lutine Hele Neinguti' Nene Kilisitolesi Gohi Oti Minevo' Alevo' Igi Nizani' Nenako Lengemeni Dameni Litehelo' E'metami Lengemeni Dameni Gosohoto' Nene E'meti Igi Mili Minilizave Lo Paulo' Lo-ngimine' Gamazi

1 Nemu' nene Kilisito' hilinguti' O'moso'mo do ote-dingu' nene lengikisi lutine helavo minanguti' nene maka' do ote-lengedavo nizani' nenako nemu' nene lingine Kilisito' O'mosoloti' lemo mino ana hulaa' ida neida Okulumoku' minine' monovo danavavo' nene dalone li gili mini gono di minilo. 2 Me misubou' minine' initeti' nene lutine milami asi Okulumokuko neine' monovo danavalokovo' nene lutine mili gili minilo. 3 Ne'mine noluvoni' nene neemul' noluve: Lingine hili nizani' gelavosa minevo' alevotine gihile nene Kilisitongu' haleke neine' nene mo O'mosola neive. 4 Ne neiha minevo' alevotine'mi izeleho Kilisito' ogo soto' pizeline' nene linginesi a'mine'mine igi lengemeni dameni okodine atoli'minesi maka' soto' ilisave.

5 Nemu' nene lingine me misubou' monovo danava goloso lutingu' neine' ado' vene' vemoho' gipe alu gopo ingaa' monovosi ido' lute do goloso iline' monovo ato ato' nesi ido' inite' goloso mamu' lutine otavo ninge lamine' oga' nesi ido' inite' gohi masi masi dunivoo lii mumuzo' oga' monovo nene soza o'mosolo' gelekele' oga' monovo ne'mine nenaze a'mine nesi nene mo ngibili hilani' gelavo mudise hulisa minilo. 6 O'moso'mi gamazi gili huli ne'mine monovo igi mili iga' avemu' nene O'moso izebolo' molavo lihime ngemeleseive. 7 Ido' linginesi gomul' a'mine ne'mine monovo nene lengi' lutine'mine lolo' ogavo minangu' nene a'mido' e'meti igi mili minaa' ani' ma neive. 8 Ne'mine igi minani'za idise a'mine nene hulisa ma me'mine monovo nesi nene hulilo: Ado' lingizebolo' mala' mala' nesi ido' evene' singehe' goloso minaa' nesi

ido' lukehe lakehe oga' monovo nesi ido' dovo ledevoka laa' monovo nesi ido' gamazi goloso laa' nesi nene mo mudise hulilo. ⁹ Lengiku' gamazi lilizangu' nene sozasi lamilo. Lingine gomu' lengemeni damenisi ido' a'mine'mo ogo molo oga' ine' monovo've golososi nene di hulisa ¹⁰ lengemeni dameni gosoho' di otuhani' ma neive. A'mine lengemeni dameni nene O'moso'mo lingine eikumu' gili vevesi osu' li minilizangumu' ve lo ei' a'mine lengemeni dameni do soto' ive'mi avazahalo' gehepeve nene gohi do gosoho' o'mo voovo' neive. ¹¹ Ido' ne'mino do gosoho' o-lidingu' mene gomu' ho'lo ato ato' minune' monovo ma nene mo mudise osu' laave. Ado' evene' linge ma nene heta ato' aleve nGiliki aleve nevo'mine minavo linge ma Zuda aleve minunivo ne'mo ho'lo minune' nolihe ido' linge ma okodela O'moso'mi noso neivo linge ma nomivo haza nizavoo minune' nolihe ido' linge ma nene save dunive ne'mine nonivo linge ma nene save damave evene' lopooso ne'mine minavo minune' nolihe ido' linge ma goboni ve minavo linge ma nene evene' maliti goboni ve minamo haza nonivo minune' nolihe laza ne'mino minaa' une' ma nene idise Kilisito' aza leli' mukiliti nabate lolo' ogo leli' nene mukiku' mine molo neine' nenako nemu' nene ne'mino ho'lo minaa' une' monovo ma nene mo osu' lave.

¹² Ne'mino neine' nenako nemu' nene lingine O'moso'mo lengi' nene do kegeso do eita ogosa lulo lengeme neive ei' evenele nizani' nenaze. Lingine me'mine monovo nene di otuhi igi mili minilo. Ado' muludine hukavo evene' mulumo'ine ningaa' monovosi ido' nasahili' o-

ngedaa' monovosi ido' okode do lemo minaa' monovo nesi ido' muludine laminekisi hongu lo minaa' monovo nesi ido' lingizebolo' molani' inite' ikevo ma goloso gelamo zou lo minaa' monovo nesi nene di otuhi ¹³ lengiku' evene' malite lingizebolo' molali inite' i-lingidika' i-lingidika' navo ma nemu' nene gosele' lengebelamivo gili huli a'mine lihime'ine nene hulingidilo. Ee, Guvelesi ve'mo lengi' lihimetine nene hulo-lingidine' nenaze. A'mine'mine igi lingine nene ge lihimeka hulo-gede ne lihime'ne hulo-nede livo' minilo. ¹⁴ Ido' lingine ne'mine mana'mine inite' igi mili minaa' naani' nene ngivile' ivosa inite' naba nene lutine ngemaa' monovo nene di otuhi igi mili minilizave. A'mine lute ngemaa' monovo ne'mo nene monovo lamine' muki' nene asabu' ize neivosa laminovo' minelonido' do hamo' o-ledaa' neive. ¹⁵ Kilisito' elese molo-lengedo lengele'mize eita ine' nene lingine lutine hamo' ogavo hongu li laminivo' minilizave losa ne'mine ine' nenaze. Lingine ne'mine mana'mine inite' ilisa gili ma nene gomu' a'mine initekumu' ize' mili di ningi Kilisitodati' hongu lo lamino minaa' monovolo' nene e'metilizani' aka vele-lengedeline' initekovo' ilo. Ne'mine igi mini O'moso isaa' neve li opo'ni li minilo. ¹⁶ Kilisito' gamazi've nene lutingu' vauve goloso elosa mine molo minivo minilo. Ne'mine igi otohato gamazi gehepeve li ge apize neme ne apize geme ido' ge hungo' molo neme ne hungo' molo geme lisa mono' nama ato ato' mono' godolouti' mono' nama nehe idise a'mene laa' naani' mono' nama nehe ido' O'moso'mi

Sikalahu' ne'mo lo soto' ogo lo-lengemeline' mono' nama nehe neeve nene li O'moso nene isaa' neve li a'mine nama nene lutinguti' gehepeve li-ima' igisa minilo. ¹⁷ Lngine gono dalizangu' nehe gamazi lilizangu' nehe nadi' nadi' ilizahe a'mingu' nene Izesu' aza lengi' Guvetinesi ve miningumu' nene soto' ogo minelido' di milisa igi mili ei' Izesu'nimu' nene melehine O'moso isaa' neve li-di minilo.

Vene' Vemoho' Engikisi Izipaha'nesi Ize'ninge Me'ningesi Ido' Gonou' Vesi Gizebo Ve'nesi In-gine Igi Mili Iliza Monovomu' Paulo' Lo-ngimine' Gamazi

¹⁸ Lngine Guvesi ve'mi evenele nizanako nemu' nene vene' lengi' nene vadinge lilizani' gamazilo' nene gelekele' igi gili daakovo' igi minilizado' o neine' nenaze. Gelekele' i-ngidi minilo. ¹⁹ Ido' vemoho' lengi' nene eledingine lutine ngimi mini gosele' ngebeleline' inite' i-ngidamilo. ²⁰ Ido' izipe lengi' nene izetingine metingine gelekele' i-ngidi minilizani' nene Guvesi ve'mo gilivo mulunou' lamine' oloseize. Gamene gamene gelekele' i-ngidivo' minilo. ²¹ Ido' ize'ninge me'ninge lngine izipahatine gosele' ngibilivoovo' minikelizaze. nGizebolo' molali inite' inite' i-ngidi minamilo. ²² Ido' gonou' ve lngine nene me misubouko gizebo i-lingidaa' naavetine nene gamene gamene gelekele' i-ngidivo' minaa' ilo. Ido' ne'mini gelekele' i-ngidilizani' nene lengi' gizebo vetinelite lengikumumu' ningi lamine' gililizave li engi' ve'nido' nene gono amuzo mili daa' naave gili gono di miniisa alinge'

ingine ningamavo gono gilizevo igi di minaa' ne'mine nene amii asi Guvelesi vemu' golise gili mini lutine gonotidokovo' mili mini gono di minilo. ²³ Ne'mine mana'mine gono dalizangu' nene eveneliti gono di-ngidamii asi Guvelesi ve'mi gono nidi-dani' gilivosa lutine laminetoti' gehepeve nene di minilo. ²⁴ Ido' ne'mine ilizani' nene Guvelesi ve'mo a'mine gonotido' golo hizo salani molo-lidine' inite' nene menitine ne'mine lehize-lengedeline' mamu' nene gili nizani' nenako nemu' nene ne'mine ilisaave. Linginge gelekele' i-di nizave nene Guvelesi ve Kilisito'ni gelekele' i-di nizani' ve. ²⁵ Ido' ne'mine noluvoni' nene ingine gamazi've avuto' igi monovo goloso ilizave nene hamokisi vo'nelo' ve ve lo ma ninge mate-ngedamo muki' nene monovo goloso ilizado' golo hizo lihime ngeme osu' loloseive.

4

¹ Ido' gonolo' veti gizebo ve'ine lingine Oku-lumoku' nene lengito' gizebo vetine ma neine' ne-naze. A'minemu' nene gili mini lengi' gonou' vetine nene monovo hehe lo mineline' lisihekovo' nene i-ngidisa minilo.

Igi Mili Minilizani' Monovo Gohi Mamu' Paulo' Ga'ine Do Line' Gamazi

² Ido' O'mosola li minilizani' nene hulami laakovo' igi minilo. Ido' ne'mini O'mosola li minilizangu' nene lutine okise ongamivoo gilingili igi O'moso nene isaa' neve li-di minilo. ³⁻⁴ Ido' Kilisito' gamazi've gomu' suno' minine' lo soto' ogo lo-ngemeloningumu' nene O'moso'mo

akahe si'ze-ledaavo naza lolodo' o neido' do molo lolongumu' neni' nene a'mine gamazi lovo ngolo' lovo' ogo lo-ngemelive lii lingine a'mine O'mosola li minilizangu' nene lelikumukisi lilo. Naza nalato' ve nouvoni' nene a'mine Kilisito' gamazi've lo soto' oga' uvongumu' nene nouve. ⁵ Ido' lingine nene gopo moni minamii evene' ado' Izesu' evenele lili' ami heta minave nene nanite' di-ngidilizahe a'minemu' nene gatine gili nge li mini monovo laminekovo' i-ngidi evene' hize ele' i-ngidiliza gonotine lamine' soto' iline' nene mo diivo' minilo. ⁶ Ido' gamazitine lilizani' nene gamazi unuvo huhu lo mino melele' o mine-line' gamazivo' lilo. Ne'mine igi minilizaani' nene monokumu' ma longo' i-lingidilizave hamo hamo' nene di velepe' izi li-ngimiliza gamazimu' nene gili hehe li minisa minilizave.

Paulo' Gamazi Lo Osu' Nolo Geke' Lo-ngidine' Gamazi

⁷ Ido' nenita soto' o'mo novine' initekumu' gamazi've muki' nene Tikiko' lo-lengemeleseive. Aza nene Kilisito' evenele leli' zuho Guvetesi ve'mi gelekele' izipe've lisihe' lamine' lelikisi maka' gono daa' ive neivo lu'ne emaa' nouve minive ⁸ ne'mo leli' gamazi nene lo-lengemo muludingu' do lamine' ilive lo imiselekuvo lengita nesene novive. ⁹ Ido' lengikuti' ve Onesimo' nene leze zuho peleseve' izamaa' ive lute eme nonive minive aza nene ezesi maka' nivasive. Inginge nene mela minine' gamazi muki' nene li-lingimilisasive.

¹⁰ Nenikisi maka' nalato' nosive Alisitako' ne'mo nene longopo'ni nolive. Ido' Banabasi'

oholoho Maleko' nesi nene longopo'ni nolive. Ezemu' i-dilizani' gamazi nene mo lengita hulo nouvo mo gili nizani' ma neive. Lengita naavo ma nene ele'mize lamine' ilo. ¹¹ Ido' ve ma gulive Izesu' ve lo minine' ado' gulive've gohi ma Zusito' ve li li-daa' ave neesi nene longopo'ni nolive. Zuda ve minanguti' nene a'mine luve metevo' nene nenikisi maka' O'moso'mo gizebo o-ledelingumu' gono daa' unive minii a'mine nete nene hize ele' gehepeve i-nidave. ¹² Ido' lengikuti' minive mino Izesu' Kilisito' gonolo' ve minive Epahala' nesi nene longopo'ni nolive. Aza lengikumu' nene gamene gamene O'mosola zege' zege' ogo laa' neive. Ee, lingine monoku' lodive igi O'moso'mo lulou' giline' gamazi muki' nene gili hehe li a'mido' e'meti osu' lilizave losa nene O'mosola laa' neive. ¹³ Ee, naza eze monovo nene mo gele noosa a'minemu' nene ti' lo noluve: Aza neve nene lengikumukisi ido' Izesu' evenele Laodikia ebeku' minavemukisi ido' Hielapoli ebeku' minavemukisi nene ge'nebe gono goloso amuzo molosa do minaa' neive. ¹⁴ Ido' longopo'ni gohi ma nilasine' nene lute eme nonive tota ve Luka' nesi ido' ve ma Dema' nesi nene nilasive. ¹⁵ Ido' laza leze zuho Laodikia ebeku' mulise milaa' naavesi ido' Nimiha'nisi ido' mono' aleve eze numu'veu' mulise milaa' naavesi nene ngopo'ni noluze. Li-ngimilo. ¹⁶ Ido' luhuvo nite' meve nene gati li-lingimikevo ma nene Laodikia ebeku' mulise milaa' naangu' nesi nene gatilizangisi huli-ngidilizave. Ido' Laodikia ebeku' di nizani' luhuvo nite' nene lingine di igi a'minesi nene gatilo. ¹⁷ Ido' Alakipo'ni nene ti' li li-imilo: Gaza Guvelesi ve'mo gimine' gono nene

hulamo mo do pelelove lo gele minosa dalosane.

¹⁸ Luhuvo nite' gizi-nidaveti a'ninguti' luhuvo gizaa' inite' nene doosa neni' Paulo' nene longopo'ni lo neni' a'nedunu' nogizuve. Nemu' nene lingine nalato' nouvongumu' nene gatine molalize. A'minemu' nene gili minilo. O'moso'mi nasahili've ne'mo nene lengita mine molo minivoo.

MONO' GODOLO GOSOHO'
The New Testament in the Dano (Upper Asaro)
language of Papua New Guinea
Nupela Testamen long tokples Dano (Upper Asaro)
long Niugini

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 21 Feb 2024 from source files dated 31 Aug 2023

76c78bc1-63e6-5f61-a363-169051cfe72e